

# Huanocca ima teppe tahidecca

## 1 Juan

Huanopa Jesocca dodosse tabaqqi ojaría. Ajijaro ima teppepi Jeso-dsa jehe quinajaridenidsa dsodo inajaro. Pohuadenidsa: –Occa ejedenissa tiquinajaro –najari. Huano dsodo inajaropi Diopa ssiaja tahi, Pohua Bedi Jesocristo naco imasiri cappirahi, najari. Pocca dsodoniji onihipi: Imecotedeni tedseje eti cahanerara cananina bica tani. Diodsa imadinissa tanijinepi imasiri jirehe imadina, najari.

Huanocca dsodonijipi 5 nani. Tahideccapi Jeso tahimari. Dsotodeccapi ajijaro ima teppepaji. Ima teppe onih naqui dsodo inajaro. Dsotode ima teppe onih dsodo inapomajaro. Dsotode jadahi tocajadsa naco Apocalipsis dsodo inajaro.

### Jesocristopa Dio Atti camittehecca

**1** <sup>1</sup>¿Nija imecotedeni? Tiadenidsa Dio Atti camittehecca ima dsodo inajaro. Najaripa dsama toja-  
jeraccadsama madipojari. Jidapana naco madihi paja nahi. Iapi pohua atti imittade. Assire naco qqui inada. Pohuadsa jaijaridsadsa inoccodsa qqui idsanapode. Idsepe-dsa naco huapi bara inada. Najaripa Dio Atti camittehecca. <sup>2</sup>Diopa najaro camittehe iadsa nohue inajarode. Najaro camittehe qqui inajaropi aji ecomeraridsajaropaji. Tiadenidsa naqui najaro camittehe jiquejeranicca tahimarini huati inajaropaji. Najaro camittehepi Abi Diodsa anipojaro. Najaro iadsa ahuatjarode. <sup>3</sup>Nadsama aji qqui inajaro, imittajaro tiadenidsa huati inajaropi iadsa tijariqqui-mananijine. Pina ia Abi Diodsa

ijariqquijarossa, Pohua Bedi Jeso-cristodsa naqui ijariqquijarossa tiquinanijine. <sup>4</sup>Aji ima dsodo inajaropi ticcadeni huatidsehe pajirani-ssa tanijine.

### Diopa ssiaja tahi

<sup>5</sup>Aja Jesocristo ia mari tocanabaqquijaricca imaha aji tiadenidsa huati inajaropaji: Diopa ssiaja tahi. Pohuadsapi dsidsini nohuerani. <sup>6</sup>Ettipi: –Diocca iquejenani –ihinanaraha dsidsinidsa jaijaridsadsapi imajidsajaro. Pajissehe imittaraha najarossa inana-jerani. <sup>7</sup>Naraha ssiajanidsa jaijaridsadsapi pina Dio ssiaja taha madijarissa inanijine. Nadsapi imecotedeni tedseje ijariqquijaropaji. \*Dio Bedi Jesocristo emene naqui icca imasiri huapima inanamossi-dsanapojaro-paji.

<sup>8</sup>Ettipi: –Imasiri ocappirani –inadsapi ia icamajds tani.

Pajissehe iadsa nohuerani. <sup>9</sup>Naraha nahatoqquiri inani: Diopa maidsera tahi. Pocca imapi toccanissa tajaro. Pohnuadsa icca ima ecomeradsa: –Occa ima tabaccora tani. Imasiri ocajini –inadsapi Diopa icca imasiridsa: –Epejena, ohuadijerani –najari. Icca tabaccorehe sse inajaro. <sup>10</sup>Pohua Attipa: –Madijapa imasiri cajiridsamanajari –najari. Naraha ettipi: –Ohuapi imasiri ocappirani –inadsapi pina: –Diopa mamaiadsade –inajarossa najaro. Nema inanadsapi ibodidsa Dio Atti nohuerani ahuato tani.

**Jesocristopa icca ima cacattemade**

**2** <sup>1</sup>Ohuemecotedeni, tiadenipi occa ejedenissa tiquinajaro. Ajijaro ima tiadenidsa dsodo onajaro, imasiri tinanamanajeranijine onadsa. Naraha imasiri tinanamana tani. Imasiri tinanamanadsapi ticcadeni ima cacattemadepa Abihuaji anih. Najaripa Jesocristo. Pohnuapa imari pajiranissa tajaro. <sup>2</sup>Aja Jesocristo itohui pohua ccaccoradsa dsoqqejaripa icca tabaccorehe inanamossidsa Diodsa ibicanijine. Icca imasiri manaconi tojajaripa ia motta ojari inanicca manaconi toja-jarahi. Madija dsama huapima madiridsamanajaridenicca imasiri manaconi tojajari pohnuapa.

**Diocca dossenijidsa iboraqquiri inana**

<sup>3</sup>Diocca dossenijidsa iboraqquiri inadsapi nahatoqquiri inajaro: Pajissa Diopa iadsa jidsera tajari. <sup>4</sup>Naraha madija ohuaha attidenipa: –Diodsa nahatoqquiri

inani –quinaraha Diocca dosseniji ecahuamana-jeradsapi maidsamanajari. Pajissehepi pohnuadenidsa anijerani. <sup>5</sup>Madijapa Diocca dossenijissa inanamanajarodenina Dio Pohnuadsa huatideni huanaqquiri najari. Poccadeni tohuati huanehepi Diodsa pajiranissa tajaro. Ijine ima bicani nema nadsana nahatoqquiri inajaro. Pajissa iapi pocca iquejenajaro. <sup>6</sup>Madija attipa: –Diocca ojani –nadsapa pocca madie pina Jesocca madiessa nadsana bica tani.

<sup>7</sup>Ohuemecotedeni, titohuideni ohuati huana tani. Diocca dosseniji tiadenidsa dsodo onajaropi dsati jerani. Aji tahide timittamanapojarocca tiadenidsa dsodo onapomajaro. Pocca dosseniji anipojaropi: –Timecotedenidsa tetideni huanaqquiri naji –najaro anijonajaropi timittamanani paji naccani. <sup>8</sup>Naraha aji jidapana tiadenidsa Diocca dosseniji dsodo onajaropi dsati. Najaro dossenijipi Jesocristo-dsa ahuato, iadsa ahuato tajaropaji. Dsidsinipi tohuatorajonani. Ssijani pajissaccana tossijaridsajonani.

<sup>9</sup>Madija attidenipa: –Iapi ssijanidsa imadijaro –quiquinana-raha pohnuadeni imecotedsa nacserraqquiri nadsapa dsidsinidsa madimanahipaja naccajari. <sup>10</sup>Pohnuadeni imecotedsa huatideni huanaqquiri naha madimanadsana pajissa ssijanidsa madimanajari. Ssijanidsa madimanadsapa pohnuadeni imecotedsa imasiri inanamanajerenitohui. <sup>11</sup>Naraha pohua imecotedsa nacassera tajaripa dsidsinidsa madijari. Dsidsinidsa ccaridsajari. Pohnu jahine ssamo tahi. Dsidsinijine pina nocco sirissa najari.

**Ajjaro dsamacca imasiri  
inebonicca ima**

<sup>12</sup> Ohuemecotedeni, occa ejedenissa tiquinajaro. Tiadenidsa dsodo onajaropi Jesopa ticcadeni imasiri manaconi tojararijine Dio ticcadeni imasiri epeje inanajaropaji. <sup>13-14</sup> Jadahideni, tiadenidsa naqui dsodo onajaro. Aja Dio dsama inahatopo-jeraccadsama madijaripa Jeso pohuadsa tinoccodeni jidseraqqiri nani. Dsabissodeni, dsohuatodeni, tiadenidsa naqui dsodo onajaro. Dio Atti tibodidenidsa anijaro. Dacoraqqiri tiquinani. Aja Diocca huadi Satanapa ajamani tinanamanajari. Tiadenina deni tiquejenajaro.

Jehe ohuemecotedeni, tiadeni huapima Abi Diodsa nahatoqqiri tiquinani. Najaroa aji tiadenidsa occa ima dsodo onajaropaji. <sup>15</sup> Ajjaro dsamacca imatohuira tetideni huanaqqiri nejeraji. Ajjaro dsamacca inoccodsa qqui inajarotohuipi tetideni huanaqqiri nejeraji. Ajjaro dsamacca imatohuira timadimanadsapi ticcadeni ima ahuato tajaro: Diodsapi tetideni huanaqqiri nejerani. <sup>16</sup> Ajjaro dsamadsa imadjarocca imapi ajima najaro: Aji timedenicca tohuini, aji tinoccodenidsa qqui tiquinajarocca tohuini, aji tettidenipi: –Odsepe sse tana. Ohuana deni ojana –tiquinajaro tohuini tiquinaraha najaro ima huapimapi Diojine jerani. Najaro huapimapi ajijaro dsamacca ima. <sup>17</sup> Naraha ajijaro dsamapi jicanitohui. Ajjaro dsama nemanehicca tabaccorehe tohuini quinahicca naqui jicanitohui. Naraha madija Dio Pohua tohuini nahiccara

inanamanajarodenipa Pohuadsa madimana-dsanapohuitohui.

**Cristodsa huadiqqiri  
najarideni**

<sup>18</sup> Ohuemecotedeni, occa ejedenissa tiquinajaro. Dsama jicanicca huada tohuajirajonani. Cristo ccanibote nadsapa pohuadsa huadi tajari ccajonahitohui. Najaro imapi timittamanapode. Jidapana naco Cristodsa huadiqqiri najaridenipa ahuatoma-ridsamanahi. Najaropi nahatoqqiri inani: Dsama jicanicca huada bacco tajaro. <sup>19</sup> Pohuadenipa iadsa quequeriqquimana naraha ia tonebobaqquijari. Pajissa iadsama Jesocristocca toquejenadsapa nassa iadsa quequeriqquimana-dsanapohuitohuiraha iadsa quejemamajaradsapa poccadeni ima iadsa ahuato tajaro: Pohuadenipa imecote quejena-jarahi.

<sup>20</sup> Naraha tiadenipi pina pohuadenissa tiquinejerani. Cristo tiadenidsa Dio Corime da inaridsadsapa tibodidenidsa madijari. Najari Dio Corimejine Diocca pajissehe nahatoqqiri tiquinajaropaji. <sup>21</sup> Pajissacca ima tiadenidsa jidsera tadsapi aji tiadenidsa dsodo onajaropaji. Pajissehecca ima ssamoqqiri tiquinani onejerajaro. Tiadenipi nahatoqqiri tiquinani pajissehepi maidsehe jerani. <sup>22</sup> ¿Nejecojarina mamaiadsade? Aja madija atti: –Jesopa Cristo-Mesia jarahi –nanaridsa najarina mamaiadsade. Najaripa Cristodsa huadi tajari. Abi Diodsa: –Pajissa madihi –najarajari. Pohua Bedi Jesocristodsa naco: –Pajissa madihi –najarajari. <sup>23</sup> Nadsama aja madija attideni: –Jesopa Dio Bedi jarahi

– quiquinanajaridenipa Dio jiraha mamadimana najari. Naraha aja madija attideni: – Jesopa \*Dio Bedi – quiquinanajaridenina Abi Diocca ejedeni toquejenajari.

<sup>24</sup> Jehe, Dio Bedi tahimari timittamanapode. Najaropi tibodidenidsa tecahuamananissa taji. Aji timittamanapojarocca naqui tibodidenidsa aninipaji nadsapi Abi Diodsa, Pohua Bedidsa tijariquimana-dsanaponitohui. <sup>25</sup> Jehe, najaropi Jesocristo toccamacossani-jaraccadsama iadsa huati tapojaride: – Ohuadsa tiquejenadsapi camittehe jiquejeranicca ticajimana-dsanaponitohui –nade iadsa.

<sup>26</sup> Ajijaro ima tiadenidsa dsodo onajaropi nahatoququiri tiquinaponijine: Madija tiadeni tocamaisa-baqquimanahijine animanahi. <sup>27</sup> Naraha Jesocristopa tiadenidsa Dio Corime da inaridsajaripa tiadenidsa madihipaja nahi. Najaria aja tiadeni mari tocanabaqqujaripaja. ¿Nejecotohui madijacca marinaja onihi timittamananijine? Dio Corimena ima huapima tiadeni mari tocanabaqqujari. Pajissara huati huati tajari, maidsa-jarajari. Aja Dio Pohua Corime tiadeni mari tocanabaqqipojaricca marinajadsa disseraqqquiri tiquinaji, Cristodsa timadimana-dsanaponijine.

### **Diocca ejedeni iquejenajarocca ima**

<sup>28</sup> Ohuemecotedeni, occa ejedeni-ssa tiquinajaro. Jidapapi Jesocristo pohuadsa timadimanani-ssa dsanapoji. Nani nidsa Jeso pohua ccaronapomadsa tibodideni cappina-jeranijine. Pohua qqqui tiquinadsa comehiqqquiri

tiquinejeranijine. <sup>29</sup> Jesocristopa ima bicani pajiranissa inanajaro. Najaro pocca ima nahatoququiri tiquinadsapi aja madija ima bicani pajiranissa inanamanadsapi Diocca madija toquejenahi nahatoququiri tiquinajaro.

### **Diocca ejedeni iquejenajarocca ima denima aniccani**

**3** <sup>1</sup> ¡Qqui! Abi Diopa itohui huati cahanari canajarijine madija iadsa: – Diocca ejedeni – quiquinanajari. Nadsapi pajissa pocca ejedeni iquejenajaro. Naraha ajijaro dsamacca madija huapimapa Diodsa noccodeni jidsaqqquiri napoja najaria iadsa naco noccodeni jidsaqqquiri najaripaja. <sup>2</sup> Ohuemecotedeni, titohuideni ohuati huana tani. Jidapapi Diocca ejedeni iquejenani. Naraha itedsejemacca ima denimapi ssamoqqquiri inaccani. – ¿Iapi pina nejecossa inapadseje? – inaraha najaro imapi iadsa ahuato tejeraccani. Naraha ajijaro imana nahatoququiri inajaro: Nidsa Jesocristo iadsa ahuatoni-pomadsa pohua qqqui inahissa tadsapa iapi pina pohuassa inanitohui. <sup>3</sup> Nadsama aja madija attideni: – Jeso ahuatoni-pomadsapa pina pohuassa inanitohui – quiquinanajaripa pohuadeni cacahuamanahissa tajari, bodideni huireqqquiri nahijine. Pina Jeso pohua imasiri cappira, bodi huire tajarissa quinahijine.

<sup>4</sup> Naraha aja madija imasiri ihinanamana najaropi Diocca dosse-nijidsa iboqqquiri najari. ¿Imasiripi nejecoma najaro? Imasiripi aji Diocca dossenijidsa huattajo inajarona imasiri. <sup>5</sup> Naraha tiadenipi

nahatoqquri tiquinani: Aja Jeso-  
cristopa icca imasiri inajicanijine  
namihuaji ccaronajari. Puhuapa  
imasiri cappiraja najari. <sup>6</sup>Nadsapa  
pohuadsa madimanahissa tajari-  
denipa imasiri jiraha madimanajari.  
Naraha imasiridsa disseraqquri  
najaridenipa Jesodsa nocco-  
deni jidsaqquri najari. Pohua-  
dsa bodideni ssamoqquri najari.  
<sup>7</sup>Ohuemecotedeni, occa ejedenissa  
tiquinajaro. Paji, madija ohuaha  
tiadeni tocamaidasabaqquirana.  
Ima pajissapi ajima najarona paji:  
Jesocristopa ima bicani ponira  
pajiranissa tehe cajijari. Aja madija  
ima bicani pajiranissa inanamana-  
dsapi pina Jesojinessa inanamana-  
jaro. Pahuadenipa Dio inapajira-  
baqquihissa tapoja najari. <sup>8</sup>Naraha  
madija imasiri totonanadedenipa  
Diocca huadi Satanacca madija.  
Satanapa tahide imasiri inanajona-  
jaroa jidapana ajijaropaji. Najaricca  
tabaccorehe inajicanijine Dio Bedi  
ccaronajari.

<sup>9</sup>Nadsama Djojine dsati iquejena-  
dsapi imasiri ihinana nejerajaropaji.  
Diocca daniji madie bicani icaji-  
jaro. Diocca ejedeni iquejenadsapi  
imasiri inanadsanaponijine ssamo  
tani. <sup>10</sup> – ¿Nejecojaridenina Diocca  
ejedenideni? ¿Nejecojaridenina Dio-  
cca huadi Satanacca ejedenideni?  
– titiquina naraha nahatoqquri  
tiquinanijinepi ajima najarona paji:  
Madija ima bicani ihinanamana  
nejerajarodenipa Diocca ejedeni  
quejena-jarajari. Madija pohuadeni  
imecotedenidsa huatideni huanera-  
qquri najarideni naco Diocca  
ejedeni quejena-jarajari. Najari-  
denina Diocca huadi Satanacca  
ejedeni quejenajari.

### Eti cahanerara canana

<sup>11</sup>Ajijaro marinajapi tahide mari  
mari quinapodsa timittamanajona-  
jaroa jidapana timittamanani paji  
naccani. Najaropi eti cahanerara  
cananijinecca marinaja. <sup>12</sup>Iapi  
pina Caino huati huanera tajari-  
ssa inejerana. Cainopa Satanaccaja  
najari. Najaria aja pohua imecote  
inanadsoqquejaripaja. ¿Nejecotohui  
pohua imecote inanadsoqquejari-  
tta? Pohua imecotepa pina Diocca  
dossenijissa inanadsapi ima bicani  
inanajaro. Naraha Cainopa pina  
Diocca dossenijissa inana-jeradsapi  
tabaccorehe inanajaro.

<sup>13</sup>Ohuemecotedeni, tiadenidsa  
ohuattipi ajima onajaro: Ajijaro  
dsamacca imadsa madimanajari-  
denipa tiadenidsa nacasseraqquri  
nadsa huajo ticanire tejerana,  
onajaro. <sup>14</sup>Aji imecotedsa eti huana  
tadsapi icca ima ahuato tajaro-  
paji. Iapi paji idsoqquerinicca  
dsoqquehe inebodsapi camittehe  
jiquejeraniccadsana imadijaro.  
Naraha aja madija pohua ime-  
cotedsa huati huanera tajaripa  
pina huatiahi madi-dsanapojari-  
ssa najari. <sup>15</sup>Nadsama aja madija pohua  
imecotedsa nacassera tajaripa  
pina pohua imecote inanadsoqque-  
jarissa najari. Nadsama tiadenipi  
nahatoqquri tiquinani: Aja madija  
pohua tesse inanadsoqquedsapa  
Diocca camittehe jiquejeranicca  
pohua bodidsa nohueraha madi-  
jari. <sup>16</sup>Jesopa pocca madie iadsa  
eccoradsapi itohui dsoqquejaripaja.  
Najarojinea aji tohuati huanehe  
icahatterajaropaji. Nema nadsapi  
ia naqui imecotedeni tocassiejera-  
hijinepa iana ia eccorani bica

tani. <sup>17</sup>Tiadenidsa dsepe sse tajari ojaría aniraha pohua imecote cappirahi qqú tadsa acco icamajaradsapa ¿pohua bodidsa Diocca tohuati huanehe cajico? Caji-jarahi. <sup>18</sup>Ohuemecotedeni, occa ejedenissa tiquinajaro. Iapi ettidsara eti huana tani ojari nejerana. Aji idsepe ijjaroma imecotedenidsa eti huana tana. Pajissa Diocca tohuati huanehe icajidsapi icca madiedsa ahuato inanana, onajaro.

### Diodsa huatide icappina-jeranijine

<sup>19</sup>Nadsama imecotedenidsa eti huana tadsapi pajissehe jinedecca iquejenani nahatoqquri inajaro. Diodsa huatide naqui ibodi cappina-jeranijine. <sup>20</sup>Ibodipi iadsa: –Imasiri ticajini –na tani. Naraha icappina-jerana. Ibodipi ajimani, Diona deni tojahi. Diopa ima huapima nahato tajari. Ibodicca ima naco nahato tajari. <sup>21</sup>Ohuemecotedeni, titohuideni ohuati huana tani. Ibodipi iadsa: –Imasiri ticajini –nejera dsapi Diodsa icappina-jerajaropaji. <sup>22</sup>Pohuadsa huati inadsa naqui icca huatinaja iadsa da da inajaro-paji. Icca huatinaja iadsa tojajaropaji. Pocca dossenijidsa iboraqquri ineje, Pohua jipa tajarissa inaneje najarojine. <sup>23</sup>Dio pocca dossenijipi ajima najaro: –Occa ejedeni Jesocristodsa jehe tiquinaji –najari. –Timecotedeni tedseje tetideni cahanerana canaji –najari iadsa. <sup>24</sup>Pocca dossenijidsa iboraqquri inadsapi pohuadsa imadijaro. Pohua naco iadsa madijaripaja. Aja Pohua Corime iadsa da inaridsajaripa najarijine Dio iadsa madihi nahatoqquri inajaropaji.

### Mamaidsadedenidsa nahatoqquri tiquinanijine

**4** <sup>1</sup>Ohuemecotedeni, titohuideni ohuati huana tani. Madija tiadenidsa huati huati tadsa pohua attipa: –Ohuapi Dio Corimejine Dio Atti huati huati onajaro –nadsapa pohua attidsa pajissa tiquinejeraccadsa tinocodsamanaccajo. –¿Pohua bodidsa Dio Corime anico? ¿Anijaraco? –titiquina nana. Madija mamaidsadepa dsama huapimadsa ijiridsahi. Pahuadeni attipa: –Dio Corimejine huati huati ihinanajaro –quiquinanaraha mamaidsamana najari. <sup>2</sup>Tiadenipi poccadeni ima nahatoqquri tiquinaji: Aja madija Dio Corime cajimanajari attidenipa: –Jesocristopa \*Dio Bedi. Pahuapa pina madijassa naha tossonajari –quiquinanajaridenina pajissehe cajimanajari. <sup>3</sup>Naraha aja Dio Corime cappiramanajari-denipa: –Jesopa Dio Bedi jarahi –quiquinanajari. –Pina iassa naha tossonajari –quiquinana-jarajari. Pahuadenipa Jesodsa huadiqquri najari. Pahuadeni bodipa pina Cristodsa huadi tajari bodissa quinajari. Nadsama aja Cristodsa huadi tajari ccjonahitohui quiquinanahipa timittamanapode. Jidapana naco pahuapa ajijaro dsamadsa madihi.

<sup>4</sup>Ohuemecotedeni, occa ejedenissa tiquinajaro. Tiadenipi Diocca tiquejenarajine mamaidsadedenidsa deni tiquejenani. Aja tiadenidsa Dio madijarina dacorajari. Ajijaro dsamacca madijapa ajamani toquejenahi. <sup>5</sup>Pahuadenipa ajijaro dsamacca imatohuira madimanagerari. Nama quinajarijine ajijaro

dsamacca imara huati huati totoquina najaripaja. Nadsapa ajijaro dsamacca madija Diocca quejena-jarajaridenipa poccadeni ima mittade jipaquiri najaripaja. <sup>6</sup>Naraha iapi Diocca iquejenajaro. Madija Diodsa nocco jidsera tajaripa icca marinaja mittajari. Naraha Diocca jarajaripa icca marinaja mitta-jarajari. Nama nadsapa iadsa ahuato tajari: Aja icca marinaja mittajaripa pohua bodidsa pajissehe cajijarijine pajissara huati huati tajari. Naraha icca marinaja mitta-jarajaripa pohua bodidsa maidsehe dadorajojine maidsehera huati huati tajari.

**Diodsa eti huana tadsapi  
imecotedsa naqui eti  
huana tanijine**

<sup>7</sup>Ohuemecotedeni, tiadenidsa ohuati huana tani. Iapi itessedeni tedseje eti cahanerara canaridsana. Tohuati huanehepi Diocca iadsa ccajonajaro. Tohuati huanehe cajimanajaridenipa Diocca ejedeni quejenajari. Pohuadenipa Diodsa noccodeni jidseraquiri najari. <sup>8</sup>Naraha tohuati huanehe cappiramanajaridenipa Diodsa noccodeni jidsaquiri najari. Diopa tohuati huanehe jinede. <sup>9</sup>Diopa iadsa huati huana tadsa pocca tohuati huanehe iadsa ahuato inanajaro. Najaria aja Pohua Bedi ojariraha nami-huaji dosse inaronajari, icassiejernijine. <sup>10</sup>Iapi Diodsa eti huanacquiri napa-jeraraha Diopa iadsa huati huana tadsa Pohua Bedi iadsa dosse inaronajari. Bedipa itohui pohua ccaccoradsapa icca imasiri manaconi tojaripaja. Najarona tohuati huanehe pajissacca.

<sup>11</sup>Ohuemecotedeni, titohuideni ohuati huana tani. Dio iadsa huati cahanari canadsapa ia naqui itessedeni tedseje eti cahanerara canaridsana, onajaro. <sup>12</sup>Madijapa Dio qqui toquinaja cama-jarahi. Naraha eti cahanerara canadsana Dio iadsa madijari. Pocca tohuati huanehe iadsa anini ahuato tajaro. <sup>13</sup>Nadsama Dio Pohua Corime iadsa da inajarojine Dio iadsa madihi nahato, manaco Diodsa imadini nahato inajaropaji. <sup>14</sup>Aja Jeso innocodsa qqui inajari tahimari ijine ahuato tanijine inadsa pohua tahimari huati huati inajaropaji: Abi Diopa pocca Ejedeni dosse inaronajari, dsama huapimacca madija Tonassiajade tojahijine. <sup>15</sup>Nadsapa madija attia: –Jesopa pajissa Dio Bedi –najarina Diodsa madijari. Dio naco pohuadsa madijari.

<sup>16</sup>Diopa iadsa huati cahanari canahi nahatoquiri inajaro. Najarodsa pajissa inajaro. Diopa tohuati huanehe jinede. Tohuati huanehema imadjaropi Diodsa imadjararo. Dio naco iadsa madiridsajari. <sup>17</sup>Pajissa imecotedenidsa eti huana tadsapi ajijaro ima nahatoquiri inapojaro: Nidsa \*madija huapimacca ima cattemanijinecca huada bacco tadsapi Dio pocca quejena-jarajaridenidsa najidsohue inassonarinitohui. Naraha iapi icappina-jeranitohui. Nema inajaropi pina Jesocristo ajijaro namidsa madidsassa inajaro. <sup>18</sup>Tohuati huanehe anidsapi cappinehe nohuerani. Tohuati huanehe iadsa pajiranissa tadsapi ibodicca cappinehepi toquena tani. Naraha Diocca najidsohue noppineni icappinadsapi Diocca

tohuati huanehe iadsa pajiranissa tejeraccani ahuato tajaro.

<sup>19</sup>Aji Diodsa eti huanaquqiri najaropi Dio Pohuana iadsa huati huana tapojari. <sup>20</sup>Naraha madija attipa: –Ohuapi Diodsa ohuati huana tani –naraha pohua imecotedsa nacassera tajaripa mamaidsade. Najaripa pohua imecote pohua noccodsa qqui taraha Diopa qqui tajarajari. Pohua imecotedsa huati huanera tadsapa Dio qqui tajarajaria huati huana tahijinepa ssamo tajaripaja. <sup>21</sup>Ajijaro marinajapi Jesocristo ia mari tocanabaquqijaride: –Diodsa tetideni huanaquqiri nadsapi timecotedenidsa naqui tetideni huanaquqiri nana –najaride iadsa.

#### Ajijaro dsamacca imadsa deni iquejenajaro

**5** <sup>1</sup>Ettipi: –Jesopa pajissa ia Idinide Cristo-Mesia –inadsapi Diocca ejedeni iquejenajaropaji. Iapi imehidsa eti huanaquqiri nadsapi pocca ejedenidenidsa naqui eti huanaquqiri najaropaji. <sup>2</sup>Diodsa eti huanaquqiri nadsa pocca dossenijissa inanadsapi nahatoquqiri inajaro: Diocca ejedenidenidsa naqui eti huanaquqiri najaro. <sup>3</sup>Diodsa eti huanaquqiri nadsapi pocca dosse-nijissa inana tani. Pocca dosse-nijipi najo tejerani. <sup>4</sup>Diocca ejedeni iquejenadsapi iana deni iquejenajaro. Ajijaro dsamacca imapi ajimani tojani. Jesocristodsa jehe inanissa tadsapi iana deni iquejenajaro. <sup>5</sup>¿Nejecojaridenina ajijaro dsamacca imasiridsa deni toquejenahijine nahatoquqiri najari? Aja madija: –Jehe, Jesopa Dio Bedi –quiquinanajaridenina paja.

#### Jeso tahimari ecomeramanani 3 najaro

<sup>6</sup>Jesocristo ajijaro namidsa cca-ronadsa pohua tahimari pajissa tojaridsajaro nahatoquqiri inani-jinepi ima 3 nehe ahuato tajaro. Ima ojariepi passocca. Najaria Jesopa passodsa totopa cajijari. Naraha passocca ima ojari-jevani. Ima onihipi pohua emenecca. Najaria aja Jeso dsoqquedsa pohua emene toccajari. Ima onihinaqui Dio Corime Jeso tahimari iadsa ahuato inajarocca. Pohuapa pajissara huati huati tajari. <sup>7</sup>Nadsapi Jeso tahimari 3 najaro ecomeramanajaro. <sup>8</sup>Dio Corimedsa nahatoquqiri inajaro. Jeso passodsa totopa cajijaricca naqui nahatoquqiri inajaro. Jeso dsoqquedsa pohua emene toccahicca naqui nahatoquqiri inajaro. Aji ima 3 najaropi najarossa naridsajaro. Jesopa Cristo-Mesia Dio Bedi. <sup>9</sup>Madija pohua noccodsa qqui tajaricca ima huati tahi imittadsapi pohuadeni attidsa pajissa ina tani. Naraha Dio pocca ima iadsa ecomerajarona denima bica tajaro. Aji Dio iadsa ima ecomerajaropi pocca Ejedeni tahimari. <sup>10</sup>Dio Bedidsa pajissa inadsapi pocca ima ibodidsa madidsajaro. Naraha madija aja Dio Pohua Bedi tahimari huati huati tajaridsa pajissa quinaradsapa pina Diodsa maidsani huahua quinararissa najari. <sup>11</sup>Aji iadsa Dio pocca ima ecomerajaropi camittehe jiquejeranicca iadsa da inajaro. Najaro camittehe jiquejeraniccapi Dio Bedidsana anijaro. <sup>12</sup>Dio Bedidsa iquejenadsapi camittehe jiquejeranicca icajini.



Naraha Dio Bedidsa iquejena-  
jeradsapi camittehe jiquejeranicca  
icappirani.

### Huanocca ima jicanicca

<sup>13</sup> – Jesopa pajissa Dio Bedi  
– tiquinajarodenidsa ajijaro ima  
dsodo onajaro, camittehe jiquejera-  
nicca ticajimanani nahatoqquri  
tiquinanijine. <sup>14</sup> Diodsa pajissa  
inanissa tadsapi ajijaro ima nahato-  
qquri inajaro: Dio Pohua jipa tahi-  
cca Pohuadsa huati huati inadsapi  
pajissa icca huatinaja mittahi.  
<sup>15</sup> Nadsapi icca huatinaja mittahi  
nahatoqquri inadsapi icca huati-  
naja icajini nahatoqquri inajaro.  
<sup>16-17</sup> Tabaccorehe huapimapi  
imasiri. Imasiri onihi onihipi Dio  
epeje inananijine jipa tahi. Nadsapi  
timecote imasiri inanani qqui  
tiquinadsapi pohuatohui Diodsa  
huati huati titiquina naji, nahi  
Dio pocca imasiri epeje inanadsa  
pohuadsa camittehe da inanjine.  
Naraha imasiri onihipi Diodsa  
denima tabaccora tajaro. Najaropi  
Dio epeje inananijine jipera tahi.  
Madija najaro imasiri tonanadsa  
Diopa pocca imasiridsa epeje inana-  
jeranitohui. Nidsa pohua dsoqque-  
dsapa najidsohue jiquejeranihuaji

paja tojarihitohui. Timecote najaro  
imasiri aji Dio epeje inananijine  
jipera tahiicca inanani qqui tiquina-  
dsapi pohuatohui Diodsa huati  
tiquinaji onejerajaro.

<sup>18</sup> Naraha iapi nahatoqquri  
inajaro: Aja Diocca ejedeni toque-  
jenajaridenipa imasiridsa madi-  
mana-jarahi. Najaridenipa Dio  
Bedi ecahuabaqqujari, nahi  
Satana inajidsobaqqi-jarahijine.  
<sup>19</sup> Nadsama iapi Diocca ejedeni  
iquejeneje najaro ibodi nahato-  
qquri inajaro. Naraha dsama  
nemanhecca madija motapa Dio-  
cca huadi Satana attidsara ibora-  
qquri najari. <sup>20</sup> Ima onihi naqui  
nahatoqquri inajaro: Dio Bedi iadsa  
ccaronajaripa ibodidsa tohuattehe  
da inajarojinea Diopa iadsa jidsera  
tajaripaja. Diopa pajissa ojari najari.  
Pohuana Dio. Iapi najaridsa imadi-  
dsanapojaro. Iapi pocca Ejedeni  
Jesocristodsa imadijaro. Najarina  
pajissa Dio Pohua ia Cacahuade.  
Najaripa camittehe jiquejeranicca  
jinede. <sup>21</sup> Ohuemecotedeni, occa  
ejedenissa tiquinajaro. Paji, siba  
nahatonidsapi: – Ia cacahuade  
– tiquina tejeraji. Aja Diodsara:  
– Ia Cacahuade ojarihi – tiquinaji,  
onajaro.